


R Æ Ð A

eptir

byskup HELGA G. THORDERSEN

R. af Dannebr.



R Æ Ð A

við vigslu

Latínuskólans í Reykjavík

1. dag Octóbr. mán. 1846,

baldin af

Byskupi HELGA G. THORDERSEN

Riddara af Dannebroke.

REYKJAVÍK.

Prentuð í prentsmiðju landsins

1846.





Heiðraða samkoma!

Ástkjæru lándar!

Jeg er viss um, að sá er einginn hjer nálægur, sem eigi finni með sjálfum sjer, að þessi stund er hátíðleg og alvarleg. Um leið og vjer lítum til hinna fornu tímanna, verður oss líka að reima auga til hinna ókomnu, því það er manninum lagið, að binda hið umliðna við hið nálæga, og hið nálæga við hið ókomna. — *Nýr skóli á nýjum stað* minnir oss á tímana sem hafa verið; hann leiðir og spásagnarandann inni hulda framtíð. Sagan segir frá því, sem var og er, og ætíð eru orð hennar alvarleg og lærdómsrík; en ímyndunin spáir hvað koma munu, og fer hún stundum nærri, en aldrei fær hún skap að þá sönnu sögu, sem er guðs verk. Einginn maður er svo skygn, hversu forspár sem hann er, að hann geti með vissu fyrirseð hvað verða munu.

Mart hefur verið rætt og ritað um flutning skólans á þenna stað, og þar sem þetta mál var svo mikils umvarðandi, þá er alls ekkert tiltökumál þó munur yrði á meiningum manna. En úr því komið er í það horf, sem nú er komið, þá er allur meiningamunur horfinn, en allir orðnir sama sinnis, með því þeir einhuga óska, að forsjónin vilji láta leiða sem mesta heill og blessun fyrir land og lýð af þessari

breytingu, og vilja, hver og einn fyrir sitt leyti, stuðla til þess af öllum þeim mætti sem þeim er gefinn, að sem hámingjusamlegast megi tiltakast; og, satt að segja, veit jeg ekki hvar ást vor til fósturjarðarinnar ætti fremur niður að koma en á þessari vorri einustu vísindastíptun, sem landið hefur að mestu að að búa; því óhappasælt er það fyrir sjerhvert land, ef flytja skal til þess vísindi eins og annan varning, úr öðrum löndum, er eigi getur fluzt nema á vissar hafnir; þessvegna er helzt að hinu að búa sem heima fyrir er og næst manni.

Vjer megun ekki gleyma, að menntun sú, sem skólinn á að veita, er ekki vegna þeirra sem í honum eiga að læra, heldur vegna landsins alls. Skólinn er fyrir landið, en ekki fyrir hina lærðu; því það er svo tilætlazt, að þeir sem þar nema, nemi í þeim tilgáangi að geta á síðan þess betur gagnast öðrum, þessi stíptan er því ekki einstakleg heldur *alþjóðleg*; hún er fyrir alla þá, sem nú lifa í landinu og fyrir þá, sem koma munu; frá einni kyuslód til annarar skal hún gánga í erfðir, og einsog *Íngólfur* nam hjer fyrstur land, svo munu og niðir hans og eptirkomendur vitja hingað víðsvegar úr landinu til að nema vizku og siðgæði, flytja þetta aptur heim með sjer, og af góðum sjóð hjarta síns útbýta aptur öðrum af því er þeir meðtóku.

Að vísu veitizt hænum *Reykjavík* bæði prýði og álit með skólanum, en hann var þess og maklegur; síðsömum únglingum er hjer ekki meiri hætta búin, nema minni sje, en annarstaðar; margra augu gæta þeirra; hinir ósíðsömu, ef nokkrir skyldu verða, munu þekkjast úr, og er það betur fyr enn seinna; því ekki mega þeir verða annara leiðtogar, sem ekki kunna að gæta sóma síns á æsku árunum, og þótt sumum kumi þykja það vafasamt, þá er það samt

eingu að síður satt, að það er til einkis, nema verri eins, að halda þeim *frá* heiminum, sem í heiminum eiga að lifa og verða öðrum til upphyggingar; það er lítið sem menn læra allskostar af sjálfum sjer, sízt það sem mestu varðar: að þekkja sjálfan sig og til hvers maður er fær; þetta lærist manni bezt af viðkynningu við marga og innbyrðis ólíka.

Þótt mjer nú finnist að mart sje um að ræða, þá hlýt jeg samt að setja mjer skordur, og, svo sem síður er til, velja mjer eitthvert það efni, sem við-eigi; þó má jeg ekki viðhafa það ræðusnið, sem mjer er tamast að undanfögnu. Jeg vildi óska að kraptar mínir leyfðu mjer að mæla nokkrum þeim orðum, sem gætu sæmilega átt við þetta hátíðlega tækifæri, og nokkurnegjins sambodið yðar sanngjarnri eptirvæntingu.

Öllum kemur án efa saman um það, að *góður skóli* sje öllum mönnum, hvar sem þeir eru og búa í heiminum, einhver hin fyrsta og mesta nauðsyn, og má færa margar og mikilvægar sönnur á það mál, en jeg ætla þó í þetta skipti að fara fram á meira sem er það: *að eingri þjóð ríði meir á góðum skóla enn Íslendingum.*

Þegar vjer nefnum *skóla*, þurfum vjer ekki að bæta því við, að vjer meinum lærðan skóla, því að undanteknum einum einasta barnaskóla hjer í bænum, er eigi nema *einn* skóli til í landinu, svo þegar skóli er nefndur er það lærður skóli eður, það sem oss er máskje tamara, latínuskóli, og er þó þetta orð næsta illa valið, einsog þar ætti mestmegnis að kenna latínu; því þó svo kunni að hafa verið forðum, þá er svo ekki leingur, heldur eru þar kennd margskonar vísindi, og er þeim að fjölga með tímanum, eptir því sem upplýsingunni fer fram; gjöra menn sjer í öðrum löndum svo mikið far af þessu, að varla er það orðið vinn-

íngur að komast fram á þessum vegi, nema fyrir gáfaða og yðna únglinga. En svo sem nú upplýsingunni fer fram annarstaðar, þá er andvitað að hörmulegt væri, ef vjer einir skyldum sitja á hakanum og ekki geta nokkurneginn fylgt tímunum. Vjer erum oflítil þjóð til að skapa nýjan tíma eður annan enn þann sem gjörist annarstaðar. Vjer verðum að fylgja, eins og bezt getum, þeim tíma sem gjörist meðal síðaðra og voldugra þjóða, er næstar liggja, eður vjer höfum spurn af; einkum erum vjer bundnir við Daumörku, og megum ekki verða svo apturúr, að vjer ekki nokkurneginn getum orðið Dönum samferða. Nú getum vjer það ekki að tímanlegri velsæld, ríkmannlegum atbúnaði, eður stórkostlegum fyrirtækjum, því vjer erum fátækir, fálíðaðir og strjálir, svo vjer náum ekki saman í svo stóru og þunnskipuðu landi, sem mestallt er fjöll og fyrindi. Vjer getum því ekki fylgt öðrum þjóðum í þeim hlutum, sem ekki gjörast nema með miklum tilkostnaði eður mannafla, svo það eru *visindin ein* eptir, sem vjer mundum helst geta þreytt til kapps um. Að *visu* útheimta þau í margan máta talsverðan kostnað, og eiga þar hin ríkari löndin ogsvo hægra; en eingin síðuð þjóð lætur sjer samt til hugar koma, að vera án skóla, og aldrei er hún svo fátæk, að hún eigi góðfúslega verji fjármunum honum til viðhalds og eflingar; því að vilja eingan skóla hafa eður, sem enn er verra, einhverja ómynd, er sama sem að afneita öllu þjóðerni, og — þarsem vjer ekki höfum nema *einn* skóla, er líklegt að sá kostnaður muni landinu ekki ofvaxinn, einsog það liggur í augum uppi, að þareð hann er ekki nema *einn* þá ber því meiri nauðsyn til — með því að þá er ekki í annað hús að venda — að hann sje sem beztur. En — það er þó einkum annað sem gjörir, að vjer

fremur í vísindum enn öðru ættum að geta fylgt tímunum, og það er: að þau eru sjálf mjög svo bundin við hið *innvortis*, sem mannum er upphaflega af guði gefið, og sem hann hefur veitt oss Íslendingum ekki síður enn öðrum þjóðum, en það eru *ndmsgáfur*, sem jeg einganveginn hermi að vjer höfum meiri enn aðrir, en fullyrði þó, að vjer höfum eigi síður enn aðrir; og í *þessu*, sem oss er gefið eins og öðrum þjóðum, megum vjer þá vel þreyta við þær, og erum þess heldur *skyldir* til þess, sem vjer ekki fáum þreytt við þær í öðru.

Land þetta á líka mikið fræðasafn fremur öðrum þjóðum á norðurlöndum, og hafa forfeður vorir með þessum ritgjörðum sínum, áunnið landinu mestan og lánggæðastan sóma; því að afreksverkum, er vjer svo köllum, báru þeir víst ekki af öðrum norðurbúum, en að vísindum einum báru þeir af þeim öllum, eins norðmönnum, sem þeir þó áttu kyn til að rekja, sem öðrum — þetta getur einginn nje vill af oss hafa. Þessvegna vil jeg spyrja, hvort það muni eigi líklegast oss til ágætis, að halda því sama fram, sem reynslan er búin að sanna, að vjer sjeum vel til hæfir og oss hefur dregið drjúgast til ágætis? Er það trúlegt, að vjer nú getum ekki leingur fylgt öðrum þjóðum í því, sem vjer áður höfum verið þeim miklu fremri í, eða eigum vjer að vera svo smálátir, að láta oss lynda það lof, sem forfeðurnir útvegnu oss, án þess sjálfir að feta í þeirra fótspor? Nú er þetta síður enn ekki sagt á þá leið, að vjer eigi höfum haft, og ennþá höfum, marga vísindamenn. Þeir eru fleiri enn ætla mætti, og óvíst hvort þeir *að tiltölu* eru fleiri í nokkru landi öðru, en jeg ætla, að þetta sje ekki að þakka skóla vorum, einsog hann var fyrrum. En högun á skólanum á þó að votta um hið *vísindalega* ástand sjer-

hvers lands, og af honum er, sem vonlegt er, dregin ályktun um það, í hverjum metum vísindi sjeu höfð á hverjum stað; því þar sem menn hirða lítið um hvernig hann sje, þá er haldið að litil upplýsing sje fyrir, einsog það ræður að líkindum, að upplýsingunni fari fram eptir því sem betra skipulag er á skólanum.

Þessvegna finnst mjer það liggja beint við, að land þetta geti einkis fremur æskt, enn að þess *einstasti* skóli verði sem beztur, einkanlega ef því verður ekki brundið, sem áður er sagt, að forfeður vorir hafi með vísindum áunnið landinu mestan heiður, samt að vjer, niðir þeirra, sjeum vel til þeirra fallnir, sem bezt má ráða af því, hversu marga lærða menn vjer höfum átt og eigum, þótt tilsögn hafi brostið í svo mörgum greinum, svo virðast má að í tjeðu efni hafi *náttúra* þjóðarinnar sýnt sig *náminu* rikari. En — vilji nokkur *þjóð* vinna sjer til ágætis, þá verður hún að fara að einsog hver *einstakur maður*; hún verður að hyggja að skapferði sínu og gáfmalagi, og taka það helzt fyrir sem henni mun bezt lagið; svo bezt mun hverri þjóð, sem hverjum einstaka manni, verða hamingju auðið; og ef Íslendingar hyggja rjett að sjálfum sjer og sögu sinni, þá geta þeir ekki rekið sjálfa sig úr vitni um, að þeim er gefinn mikill hæfilegleiki til lærdóms og mennta

Jeg vil ennþá geta þess, að mjer virðist einsog skaparinn í fleiru bendi á það, að *þessi* sje vor köllun; því honum þóknadist að setja oss á þann hólma, sem liggur einsog útúr heiminum, hvar sumar er stutt, en langur vetur, fáferðult manna á milli, og lítið til afspurnar nær eður fjær, náttúran svipmikil og alvarleg, fremur enn fögur og blíð, tilbreyting lítill og skemmtanir nær því aungvar, mannsundur sjald-

gæfir. Hvað er nú eðlilegra, þar sem svona tilhagar, enn að menn stytta sjer dagur, og skapi sjer á-nægjustund með því, að nema eitt hvað til fróðleiks, sem manni er innanhandar og faung eru á. Enda veit jeg margan þann bónda í landinu, og er jeg þó víða ókunnugur, sem lætur sjer annt um, að húa sig svo undir veturinn, að homm verði sem best varið til uppfræðingar á heimili sínu, bæði með að halda börnum til náms og láta lesa fyrir fólki sínu það, er skemmtilegt sje eður fróðlegt; þannig má svo heita, að hann setji skóla á heimili sínu. Og þetta er einmiðt það, sem vjer Íslendingarnir eigum að hafa fyrir augum oss, að vjer erum ekki það sem vjer eigum að verða eður getum orðið, fyr en *sjer-hvert heimili á landinu er orðið sinn eginu heimaskóli*. En eigi þessu að verða framgeingt, þá ber hin mesta nauðsyn til að upplýsingin sje glædd sem mest verður — en þeir, sem hana glæða, koma úr landsins skóla, og má því einnig í þessari grein vera mjög svo áriðandi, að hann sje sem bestur og þessu landi sem hagkvæmastur.

Það er enn eitt sem kallar Íslendinga til vísinda og mennta, sem jeg ætla að muni hvað mest í varið, og- er það *túngumál* þeirra. Vjer tölum enn því sama máli sem hinir fyrstu landnámsmenn, og það málið, sem í fornöld var almennt á norðurlöndum, væri nú dáíð og greptrað með forfeðrunum, ef vjer hefðum ekki varðveitt það ásamt svo mörgum fornfræðum sem á því eru rituð. Norðmenn, Danir, Svíar og Einglar hafa týnt því og tekið upp aðra túngu, en drottinn faldi það undir túngurótum litillar og fátækrar þjóðar.

Þetta mál er svo ágætt, að það er með rjetti á-litið veglegast allra norðurlanda mála, einsog það er uppspretta og undirrót þeirra allra, og finnst útlend-

um mönnum svo mjög til þess, að margir vísindamenn eru farnir að læra það, ekki einungis í Norvegi, Danmörku og Svíþjóð, heldur og útá Þýzka-landi, Frakklandi og Englandi, samt úti Vesturálfu, og fer það svo í vöxt á seinni tímum, að sumstaðar er búið að setja fasta kennendur við háskólana til þess að kenna íslenzku. En með því málið er gamallt, en tímarnir líða fram og leiða í ljós margar nýjar hugmyndir, þá er eigi alllitill vandi að halda því við hreinu og óspilltu; og þarf til þess góða kunnáttu, bæði á fornfræðum vorum, sem og á eðli málsins, að mynda ný orð fyrir nýjar hugmyndir, svo að ekki sje skotið inni útlendum orðum eður vikið frá þeim hugsunarmáta, sem þjóð vorri og tungu er eðlilegur.

Þegar vjer nú gætum þess sem oss liggur næst, sem er *móðurmálið*, þá er því svo varið, að það kallar oss til fjelagsskapar við lærða menn í Norður- og Vesturálfu heims, og er þó ekki annað fyrir að sjá, enn að það muni ná að vinna sjer álit víðar og hjá fleirum enn orðið er ennþá. Málið sjálfst, sem Íslendingar tala, er *lært mál*, og er einuig í því merkilegt, að hinir lærðu tala það ekki betur, nema miður sje, enn hinir ólærðn; þetta mál er eldra og merkilegra enn nokkurt annað á norðurlöndum; og sýnist mjer þetta vera ný uppörfun og alþjóðleg fyrir Íslendinga til að gefa sig við vísindum og unna þeim; til að fylgja í þessu tímunum og slíta eigi fjelag við önnur lönd, því síður sem þau leyta fjelagsskapar við oss, og leggja rækt við mál vort og fornfræði.

Jeg hef orðið að fara fljótt yfir allt þetta, og fremur drepíð á enn útlistað það, sem mjer fannst að einkum mætti hvetja Íslendinginn til vísinda og þeirrar laungunar, að skóli vor — þessi einasta vísindastiptun landsins — mætti verða sem fullkomn-

astur. Mjer var hægt að sýna í almennu máli, hversu áriðandi góður skóli er sjerhverju landi, og er það mikið mál og mjög svo útlistað af lærðum mönnum; en — mig lángaði til að tala *einsog Íslendingur til Íslendinga*.

Þótt nú eingum geti komið annað til hugar, eum að góður skóli sje einhver hin mesta nauðsyn hvar sem er, þá verður samt hver sá, sem ann fósturjörðu sinni, að játa, að hvergi er meiri nauðsyn á honum enn *hjer á landi*, þar sem forfeðurnir, fornfræðin, afstaða landsins, kríngunstæðurnar, gáfnalagið, málið — þar sem *allt* rekur eptir að upplýsingin fari sem mest vaxandi; — Og er í þessu tilliti minna áriðandi, hjer eum annarstaðar, að einstakir menn yfirgnæfi að lærdómi; en aptur ríður meir á því, hjer eum annarstaðar, að upplýsingin verði *sem almennust*, að hún nái til sjerhvers heimilis.

Þeir sem koma frá skólanum eiga að útbreiða þessa upplýsingu meðal almennings um landið — skólinn á Íslandi á að vera fyrir Íslendinga —; þessvegna er og áformað, að við þenna skóla sameinist annar, handa prestaefnum vorum, og mun hann að líkindum verða stofnaður að hausti, eða svo bráðlega sem verður; veit jeg að það liggur vorum allramildasta konúngi ríkt á hjarta, að hann fái sem bezt skipulag, og vildi jeg vjer kynnum svo til að gæta í því efni, sem *hans* vilji er til.

Vjer verðum allir að játa, að það er gleðilegt teiku tímanna, hversu mikil viðleitni nú er höfð á endurbót skólans, svo að síðan skóli komst á í landinu hefur aldrei verið jafnmikil rækt við hann lögð; með gleði og þakklátsemi verðum vjer og að játa, að vjer eigum stjórninni þetta að þakka, einkum hinum konúnglega vísindaelskara *KRISTJANI hinum áttunda*. Stjórnin hefur valdið upptökum

þessa máls, og gjört allt sitt til að því yrði sem bezt og skipulegast fyrirkomið.

En þeirri beztu og vitrustu stjórn er samt ómögulegt að gjöra allt einni saman, einkum þarsem hún er fjarlæg og lítt kunnug; og nú kemur til vorra kasta, að vjer kunnum að færa oss í nyt hennar velvilja og sköruglegu aðgjörðir; að vjer með þegnsamlegri elsku metum rjett hennar viðleitni og eflum með samheldni, fylgi og bróðurlegri ást það málefni, sem er svo háleitt og veglegt, svo áriðandi fyrir oss og börn vor og allt þetta land, og sem sannast mun að undir er komin heill vor og álit framvegis.

Það má því vera eitthvert mesta gleðiefni, að vita þenna skóla falinn á hendur góðum og samvizkusömum kennendum, sem allir munu leggjast á eitt með það, sem geti orðið honum til gagns og sóma, bæði í vísindalegum framförum, sem og í siðgæðum og reglusemi hinna úngu manna, sem þeim verður trúað fyrir. Með viðkvæmni og þegjandi andvörpunum finn jeg til míns veikleika, er jeg hugsa úti þá nýju köllum, sem býður þjær að tala í dag, og eptirleidis hafa afskipti af þessum skóla; með viðkvæmni, sem þó er gleðiblandin, hef jeg þá æru að tilkynna yður, að *Dr. Sveinbjörn Egilsson* er forstöðumaður þessa skóla — jeg gjöri það með *viðkvæmni*, því við höfum þekkt í æsku, geingið síðan hver sína götu, en mætumst nú aptur á efri árum, kvaddir til nokkurskonar samvinnu. Jeg tilkynni þetta með *gleði*, því þjer þekkið, einsvel og jeg, hans framúrskarandi gáfur, lærdóm og aðra kosti, sem gjöra hann svo vel hæfan til þess vanda-verks, sem hann hefur á hendur tekizt. Þjer þekkið og hinn æruverða yfirkemári, *Dr. Scheving*, og *Adjunct Gunnlögsen*, sem reyndir eru að hvoru-

tveggja, lærdómi og mannkostum. Allir þessir hafa horið hita og þunga dagsins, ekki einungis í landsins heldur og í lífsins skóla, og þeir vita hvað þeir takast á hendur; þeir þekkja og launin sem guð veitir, þegar hann gefur góðan jarðveg, samt dökk og sólskin af himni og margfaldan ávöxt, svo að sá sem yrkti verður glaður með sjálfum sjer, en viðurkennir þó í hjarta sínu, að hann er ekkert, heldur er sá allt, sem ávöxtinn gefur. Auk þessara manna eru valdir 2 úngir menn til kennenda, sem hafa álit bæði fyrir góða þekkingu og gott siðferði. Annar þessara er valinn í stað hins lærða málfræðings Konráðs Gíslasonar, sem kosinn er fastur kennari við skólann, en sem menn ekki gátu viðbúið að mundi taka við embættinu árlángt.

Það veiti æðstur drottinn, af mildi sinni og náð, að allir þessir megi í einum anda, með ráði og dád stunda það verk, sem þeim er trúað fyrir, en það er, að frama vísindi meðal vor og smekk fyrir öllu fögru og góðu; þeir mega ekki afmarka sjer visst svið, svo þeir hafi ekki eitthvert æðra fyrir augunum; þeir verða að hugsa um hvernig altaf verði komist leingra áleiðis.

Ekki má jeg, nje vil jeg, hliðra mjer hjá, að ávarpa yður, æskumenn! lærisveina í þessum skóla. Hversu góða kennendur sem þjer hafið, þá er samt ekki víst að skólinn fyrir það nái tilgáangi sínum. Ekki er hvað minnst komið undir sjálfum yður — Skólinn verður sjer ekki til mínkunar, ef þjer gjörð honum eingan vansa. Það er hvorki þetta hús nje kennendurnir, sem eru *skóli*, heldur eruð *þjer sjálfir skólinn*, því *yðar vegna* er bæði húsið byggt og duglegir kennendur tilfeingnir. Allt er því undir yður sjálfum komið. Það sem til er ætlað af yður er: ráðvendni, auðsveipni, kurteisi, námfýsi, þrífni

aður, reglusemi; og þegar jeg nefni allt þetta, skal einginn yðar geta annað sagt, enn að það sje allt á yðar valdi, og að það jafnframt sje yður sjálfum fyrir beztu — Látið yður aldrei gleymast, að þeir sem eiga yfir yður að segja, hafa *njett* til að *heimta* allt þetta af yður, og vitið, að ef þjer vanrækið eitt-hvað af því, þá eruð þjer komnir á þann stað, hvar það mun bezt henta að lempuinni fylgi nokkur strángleikur. Þessvegna finn jeg skyldu mína að gjöra öllum það vitanlegt í tíma, að sjerhver ósið-semi, hirðuleysi eða yðjuleysi, mun hjer finna stránga dómendur. En — góður guð mun gefa það yður og öllum sem aðstanda, að þjer leggið allt fram sem í yðar valdi stendur, og heiðrið fösturjörð yðar, gleðjið foreldra, kennendur og vini, og sæmið yður sjálfa með því, að stuðla til þess, ásamt kennendum yðar og öðrum, að þessi skóli nái þeim framförum, sem til er ætlaðt bæði af inulendum og útlendum. Biðjið drottinn, að hann láti eingan blett falla á yðar æsku.

Þá er enn *þetta hús* — það sýnir hversu mikils stjórnin metur vísindin, er hún hefur svo miklum kostnaði varið til byggíngariunar, og er sá andi hjá öllum siðuðum og upplýstum þjóðum í heimi, að þeim þykir óvirding í, að slík hús sjeu litilfjörleg eður litt vönduð, og meta þær í því meir sóma sinn enn tilkostnaðinn. Það þykir og vel til fallið, að æskumenn venjist við að sjá í kringum sig það, sem fallett er, og þrífalegt og þokkalegt; eykur það hjá þeim góðan smekk og getur síðan í lífinu sjezt á ýmsu; því þó þeir, sem hjer læra, sjaldnast muni verða auðmenn, þá á samt hjer heima, að opt má lítið laglega fara, og rætist það jafnan þar sem á annað borð góður smekkur er fyrir.

En — nú er kominn tími til — og máskje er hann kominn fyrir laungu — að jeg víki að niðurlagi þessa máls. Það er ekki, og verður aldrei kunnugt nema þeim *eina*, hver tilfinning eður alvara mjer býr í brjósti. Af því jeg trúi því, að orðið sje ekki ávaxtarlaust, hvenær sem andinn er því samfara, svo hef jeg nú, sem endrarnær, beðið drottinn þess, að hann vildi leggja mjer orð í munn, ekki svo það, sem býr í hyggjuviti sjálfs míns — jeg veit að mjer ber einganveginn að reida mig á það — heldur *hitt*, er honum mætti þóknast að veita fyrir sinn anda, þegar menn gleyma *sjálfum sjer*, til að minna eptir *honum*, sem í veikum er máttugur, sem alla hluti kann yfirgnæfanlegar að gjöra enn vjer höfum vit á um að biðja, sem er uppsprettulind allrar blessunar, svo að allt það sem ekki er stofnað í hans nafni, verður að detta um sjálft sig og verða að eingu, hversu sterkan grundvöll sem mennirnir þykjast hafa lagt; einsog það, sem stofnað er í *hans* nafni með hjartanlegri og alvarlegri trú, mun standast, hversu sem það í fyrstu kann sýnast að vera á veikum grundvelli byggt — Allt eigum vjer á endanum á guðs náð. Af því þetta er sannleikur, þá er *bæninni* íthellt í hvers manns brjóst; af þessu er og það orðið, að kirkjurnar og ölturin standa hvervetna á jörðinni, en kirkjan hefur fætt af sjer skólann; ekkert af þessu er skjóð fyrir *mannsins* vilja, heldur af *guðs fyrirhuguðu ráði* — þessvegna getur ekkert þetta blessast án *hans*, sem er upphaf og endir.

Í *hans* nafni — og án þess að hugsa um nokkuð annað enn hann — lýsi jeg þá blessaninni yfir þessu húsi og þeim skóla sem í því er stofnsettur, og jeg gjöri það í nafni heilagrar þrenningar, föður, sonar og hei-

lags anda, með þeirri bæn til hinns alvalda: að hann vilji byggja húsið, og láta sinn góða anda búa í því, svo kennendur og lærisveinar megi lifa þar einsog fedur og synir; — að margir merkismenn megi hjeðan útgánga, er seinna verði fósturjörðu sinni til gagns og gleði, svo að þjóðirnar, sem nú eru farnar að gefa oss auga, megi viðurkenna, að andi forfeðranna sjæ enn yfir oss; — að þessi skóli megi blómgast og ávaxtast um ókomnar aldir, og standa meðal vor Íslendinga, einsog ógleymanlegur minnisvarði konungsins ástúðlegu umhyggju, einsog hin bezta gjöf guðlegrar forsjónar.

Að svo fyrmæltu kveð jeg yður alla í drottni.

Lbs - Hbs / Þjóðdeild



101104075-1

1 8 4 6 .

Kostar 12 sk.